

NA KANA MAGITI KEI NA LOTU

Rev. Dr. I.S.Tuwere

Maciu 22:1-10; Luke 14:12-24

Na iVola Tabu e sega ni tuvalaka vakavosa vei keda na ibalebale ni lotu. E vakavuqa me boroya vei keda na iyaloyalo me vakadewataka kina na veika eso e vinakata me tukuna. E sega talega ni solia e duabulu ga na iyaloyalo me baleta na lotu. E vuqa sara e solia vei keda. Oqori me vaka na Qele ni Sipi kei na iVakatawa Vinaka; na Vuni Vaini kei na Tabana; na iVakavuvuli kei iratou na nona Gonevuli se Tisaipeli; na Masima se Rarama; na Ulu kei na vo ni Yago taucoko, ka vuqa tale.

Meda raica mada yani na iyaloyalo ni kana magiti. E rua na kena ivakamacala eda rogoca, mai na kosipeli iMaciu kei na nei Luke. Na kana magiti se na solevu edua na ka eda kila vinaka. Eda soqoni vata kina vakaveiwekani ena noda veikidavaki kei na marau, kena veitalanoa, kena sere kei na meke, kena salusalu kei na kumuni iyau. Ena kana magiti, eda veiwaraki ka tarogi edua kevaka e yali.

Meda taroga na taro: A Cava na Lotu? Ka tovolea me sauma na taro oqori ena noda raica vakavoleka yani na kana magiti. E va na taro meda na taroga :

I. O Cei e Veisureti e na Kana Magiti oqo?

E vakaraitaka na iVola Tabu ni veisureti edua na Turaga; edua na Tui. Sa nodra ivalavala na Turaga se Tui me ra dau caka magiti ka veisureti. E sega ni ka rawarawa na veisureti. E tu vata kei na kena oga; na kena vei qaravi. Ni tukuna tiko na i Vola Tabu ni caka magiti kei na veisureti sa nodra ivalavala na Tui, sa via dusia tikoga na itutu vakaturaga kecega e itutu talega ni dauveiqaravi.

Sa liu taumada na veisureti ka qai muri na kana magiti. Kevaka sa sega na veisureti, ia, sa na sega ga na kana magiti. Na lotu se na kana magiti e sega ni dua na ka me tubu ga vakataki koya, se tu ga vakataki koya. Sa duri rawa ka bula na lotu kei na kena veisolevu kecega ni sa liu tamada na kaci ni veisureti ni Turaga. O cei li oqo e veisureti? E veisureti na Turaga na Tui ko Jisu mai na koro lailai ko Nasareci. E sega ni dua tani e veisureti. E sega ni veisureti ko Kubuna se ko Burebasaga, se Tovata. Na veisureti sa nona duadua na Turaga oqo mai Nasareci. E sega ni veisureti e dua e vuku ka kila-ka vakalevu, e dua e matai ena vosa se kila vakalevu na i Vola Tabu. E sega ni dua ka bini tu vua nai yau se i lavo. Seg. E veisureti ko koya na Kalou Bula ka kacivi keda ena bula kei na cakacaka ni Luvena ko Jisu na kai Nasareci.

E na so na gauna se vuqa beka na gauna, sa laki bibi tiko e so tani tale na ka, ka mamada mai ko Jisu. E sega ni bibi na masumasu ka mamada ko Jisu. Na masu e na kana magiti, na kena veitalanoa, na kena marau kei na kena lasa era qai muri taucoko. Sa taumada na veisureti. Ke sa sega na veisureti, sa sega ni yaga ka sega ni vakaibalebale na veika kecega oqori. Sa sega ni bibi na vanua ka mamada ko Jisu. Ke vakakina, sa na sega ga ni Vakarisito na ka kece sara eda qarava. Sa na rawa me vakatokai me duatani tale na ka.

Ni liu na veisureti ka qai muri na kana magiti, liu ko Jisu ka qai muri na lotu kei na kena solevu kecega, sa qai ka bibi kina vei keda ena noda bula vakalotu:

“... .. meda vakaraici Jisu matua, ‘o koya sa vakatekivuna e na sauma talega na noda vakabauta.....” (Iperiu 12:2).

II. E vei na Vale ena laki vakayacori kina na Kana Magiti oqo?

Ni da taroga na taro oqo, eda yacova kina edua toka na vanua dredre ka ni ko koya ka veisureti oqo e sega na nona vale. E kaya na iVola Tabu me baleti koya :

*“Sa vaqara na fokisi, sa vakairoro na manumanu vuka, ia, na luve ni tamata sa sega na vanua me vakadavora kina na uluna”
(Luke 9:58-60)*

E rawa meda kaya ni fokisi edua na manumanu dravudravua. Na manumanu vuka talega e sega na ka e taukena, ia, e tiko na veitaba ni kau me ro se vakacegu kina. O Jisu e na nona vosa vakataki koya e kaya kina ni rau vinaka na manumanu e rua oqo ni tiko na vanua me rau vakacegu kina. “O koya e sega na vanua me vakadavora kina na uluna. Ia, me qai laki vakayacori evei na kana magiti ka veisureti kina oqo? E sega ni rawa nida tu vakaveilecayaki vakaoqo na sureti yani? E vei na vanua eda vakadavora tiko kina na noda vakabauta kei na noda bula vakalotu edaidai? A cava na vuna eda laki lotu tiko kina ena vei Siga Tabu? Se a cava eda lewena tiko kina edua nai soqosoqo vakalotu?

Sa rawarawa sara me vakayagataki na lotu se na kena lakovi na kana magiti oqo me ivakarawa ga ni ka eda gadreva tiko vakataki keda. E sega ni ko lakova dina mai na kana magiti - na kena masu, na kena veinanumi, na kena marau vinaka. E dua tani tale tiko na ka ko gadreva mai. Ia, ni da rogoca ni ko koya ka veisureti oqo e sega na nona vale, sa veisureti ga ena dela ni nona loloma levu vei keda, sa qai bibi sara kina meda kakua ni vakau yaloda ena loma ni lotu. Me vakayacori ga na loma ni turaga ena noda bula.

III. O cei soti e sureti ki na kana magiti oqo?

Era dau lakova ga na soqo ni kana magiti ko ira era taura edua nai vola ni veisureti. Ia, e dau vakalevu ga me ra sureti ko ira era kilai se ko ira ka ra tu ena so na i tutu lelevu. E sega na lako vakaveitalia. Ia, e duidui na kana magiti oqori mai na kana magiti eda vakasama tiko kina. Me vaka ni veisureti na Turaga ko Jisu, eda sureti kece sara. Eda yadua kece sara na i vola ni veisureti oqo. E sega kina ni rawa vua e dua - a i taukei se vulagi, marama se turaga, qase se gone lailai me vakaiulubale. Eda sureti taucoko ki na kana magiti oqo.

Na katuba ni kana magiti oqo e dau dola tu ga. E sega ni sogo. Na bula vakalotu talega e sega ni bula ni sogosogo. Na levu ni kena sogo na levu talega ni kena qiqo se butobuto. Me dola tu na lotu ki na 3 na ka lelevu :

- me dola tu ga Vua na Kalou
- me dola tu ga vei ira na tani
- me dola tu ki na veigauna tawa kilai ni Kalou, sa tu mai liu.

IV. A Cava eda na Laki Kania?

Na ka eda na laki kania mai kea, ena vakayagataki kina na nona ivola ni caka kakana (menu) na Vuku ena nona kaya :

*“Sa vinaka meda kana rourou ka veilomani ga, ka ca
meda kana pulumakau uro ka veicati tiko.”*
(Vosa Vakaibalebale 15:17).
